
Title	Tentang: Kekata cukup
Author(s)	Muhammad Ariff bin Ahmad

Copyright © 1992 Muhammad Ariff bin Ahmad

Haji Muhammad Ariff Ahmad

Sari Bahasa

SBC Warna 94.2 92051

Jun 20 1992

tentang: kekata cekup

Kekata cekup yang sebutannya hampir menyerupai cakup itu hampir sama pula bunyinya dengan kekata cekut.

Cekup bermakna *menutupi sesuatu dengan tapak tangan*. Orang menangkap lalat atau belalang dengan menepuk dan menutupi tangkapannya dengan tapak tangannya dikatakan: dia sedang mencekup lalat atau mencekup belalang.

Dalam bahasa kiasan, cekup itu membawa makna *tangkap* atau *tawan*. *mencekup* bermakna *menangkap* atau *menawan*; *dicekup* bermakna *ditangkap* atau *ditawan*, misalnya yang terpakai dalam wacana seperti:

- (1) Anak-anak yang bergelandangan di kolong-kolong flat sudah dicekup Pegawai Pemurnian Sosial.

Kadang-kadang makna *tangkap* bagi kekata cekup itu digunakan orang dalam keadaan yang agak lembut atau dalam keadaan yang santun, misalnya yang terpakai dalam wacana seperti:

- (2) Apa yang ditawarkannya itu cekuplah dahulu, dalam pada itu teruslah berunding sehingga kita perolehi apa yang kita mahu.

Dalam wacana (2) itu, cekup lebih membawa makna *ambil* atau *terima* daripada membawa makna '*tangkap*'.

Akan kekata cekut pula membawa makna *ambil* juga, tetapi *ambil sedikit* sahaja; sekira-kita dapat terpegang dengan dua jari ~ ibu jari dan jari telunjuk. Kekata mencekut bermakna *mengambil sedikit*, dicekut bermakna *dipegang* atau *diambil sedikit*, misalnya yang terpakai dalam wacana seperti:

- (3) Jangan nanti dikatakan tidak sudi, dicekutnya juga kuih itu, walaupun dia sedang berpantang memakan makanan yang manis.
- (4) Dicekutnya tangan kanan ibunya lalu diciumnya sambil melafazkan ucapan maaf yang diadatkan turun temurun.

Kadang-kadang, cekut yang dilakukan dengan dua jari itu bermakna juga *cubit*, jika cekutan itu melibatkan penggunaan kuku.

sekian dahulu.